

Nagina limita d'alcohol e nagina chatscha d'october

Parlament ha tractà la revisiun da la lescha da chatscha

■ (anr/fa) Cun 105:10 vuschs ha acceptà il cussegl grond la revisiun parziala da la lescha da chatscha grischuna. L'intenziun da reglar la consumaziun d'alcohol sco en il traffic sin via ha refusà il parlament cun 26:85 vuschs.

Suenter ina lunga debatta, entrar en la discussiun davart la revisiun parziala da la lescha da chatscha grischuna u betg, aveva il parlament decis glindesdi cun 72:38 vuschs da far quai. Suenter avair acceptà il scumond da traplas ha tractà il cussegl grond l'uschenumnada carta da giasts, sco proponida da la cumissiun e da la regenza. *Roman Hug* (pps, Tschintg Vitgs) e *Jon Pult* (ps, Cuira) han fatg dumondas da stritgar parts da quel artitgel 5.

«Restricziuns severas avunda»

Pult e Hug han criticà la proposta da limitar la quantidad da cartas da giast sin maximalmain 100 cartas. I saja problematic da laschar decider la regenza u las autoritads da chatscha tgi che haja il dretg da survegnir ina tala carta. Per tema ch'ils chatschaders d'utrò na disponian betg da las medemas enconuschientschas sco ils chatschaders grischuns ha Hug proponì da stritgar l'entir project «cartas da giast». Cussegliaier guvernativ *Mario Cavigelli* ha segirà che las restricziuns, tgi che possia vegnir en Grischun a chatscha, sajan sufficienta-main severas. «E la limita è necessaria per na auzar anc il squitsch sin la selvaschina en noss guauds, durant il settember van qua 5500 persunas grischunas a chatscha», ha el ditg. Cun 17:98 vuschs ha refusà il parlament la dumon-



Ils aspecturs e las aspecturas sin la tribuna dal cussegl grond n'han betg intervegnì midadas stravagantas da la lescha da chatscha vertenta.

FOTO M. HARTMANN

da Hug e cun 40:75 vuschs la dumonda da Pult.

«Regulaziun meglier senza la chatscha d'october»

La dumonda Kasper, d'introducir quatter dis da chatscha durant il mais d'october, ha era fatg naufragi. Commember da la cumissiun *Karl Heiz* (pld, Poschiavo) ha ditg che quella proposta saja vegnida fatga per quietar ils adversaris da la cha-

tsha speziala, «tuttina èn quels ids fin a Lausanne, al tribunal federal.» *Christian Kasper* (pld, Luzein) sez ha affirmà che la chatscha d'october eria mo in cumpromiss, cunquai ch'ils blers chatschaders sajan cunter ha'l refusà era el questa chatscha. Cussegliaier guvernativ *Cavigelli* ha punctuà che la chatscha d'october fiss mo ina chatscha speziala in mais avant, «per avair però success cun la regulaziun è la chatscha speziala durant il november vi-

navant necessaria.» Cun 101:14 vuschs ha decis il parlament da seguir la proposta da la regenza e la maiortad da la cumissiun predeliberanta e betg introducir ina chatscha d'october.

«La chatscha grischuna n'ha nagin problem d'alcohol»

La maiortad da la cumissiun e la regenza avevan proponì d'introducir per ils chatschaders en connex cun la consu-

maziun d'alcohol ed autras drogas las medemas reglas sco tar il traffic sin via. «Chatschaders sturns na ruinan betg mo l'image da lur collegas e da la chatscha grischuna, els èn era privlus per lur collegas e la selvaschina», ha manegià il president da la cumissiun predeliberanta *Walter Grass* (pbd, Tusaun). *Andreas Felix* (pbd, Tschintg Vitgs), commember da la minoritad da la cumissiun, ha respus che quai saja exagerà, «i n'ha dà ils ultims onns nagins accidents da chatscha causa alcohol, la chatscha grischuna n'ha nagin problem d'alcohol.» El ha ditg ch'igl existia en la lescha gia la pussaivladad da prender la patentà ad in chatschader che fetschia abus d'alcohol, quai basta tenor el. Cussegliaier guvernativ *Mario Cavigelli* ha manegià che la societad haja l'aspectativa che la lescha da chatscha saja en connex cun l'alcohol uschè severa sco en il traffic sin via, vul dir maximalmain 0,5 promil alcohol. La maiortad dal parlament era però d'auter avis: Cun 26:85 vuschs e quatter abstenziuns ha refusà il parlament il cunfin da promils per ils chatschaders grischuns. Uschia nun è il Grischun l'emprim chantun en Svizra cun limitas d'alcohol en la lescha da chatscha. La fracziun da la pld ha fatg a la fin la proposta da renviar a la regenza questa revisiun parziala, «causa differentas dumondas anc avertas, sco p. ex. las iniziativa davart la chatscha speziala e la chatscha cumpatibla cun la natira.» Questa proposta è vegnida refusada cun 85:32 vuschs. Il parlament ha acceptà la revisiun parziala da la lescha da chatscha cun 105:10 vuschs ed ina abstenziun.